

Жеңісің құтты болсын АТИ-ім!

Жәңгір хан атындағы Батыс Қазақстан аграрлық-техникалық университетінде біздер асыға күткен дәстүрлі «Студенттік көктем» байқауының биылғы кезеңі де өз мәресіне жетті.



Бес институттың арасында ұйымдастырылған тартысты шығармашылық сайыста өнер көрсету реттілігі жеребе суыру арқылы белгілі болды. Соның нәтижесінде біздің «Агротехнологиялық» институтының білім алушылары карсыластарымыздың ортасынан ойып тұрып орын алып, үшінші болып сахнаға шықтық. Әр институт өзіне берілген уақыт ішінде көрермен мен қазылар алқасына шығармашылық қабілеттерін паш етті. Байқаудың биылғы басты тақырыптары «Жәңгір хан университетінің 59-

көктемі» және «Бейбітшілік» болғандықтан, әр институт достық, бірлік ұғымдарын ерекше жеткізе білді. Бұл байқаудың басты мақсаты – студенттердің шығармашылық қабілеттерін дамыту және таланттарына қолдау көрсету болатын. Сайысқа әр институттан оқ бойы оза шапқан, сегіз қырлы, бір сырлы студенттер қатысты. Мамандықтары өнер саласына сай келмесе де, қоңыр үнді домбырада тебіренге күй орындап, мың бұрала би билеген, бұлбұлдай нәзік үндерімен ән салған қатысушылар көрерменді тәнті етті. Нәтижесінде бірнеше сағатқа созылған өнер кешін көрермендер бір деммен тамашалады. Осыдан-ақ Жәңгір хан университеті жастарының қанашалықты талантты екендігін байқауға болады деп ойлаймын. Бәрінен маңыздысы – байқаудың әділ өтуі. Сондықтан өнер сайысына түрлі салада қызмет етіп жүрген өз ісінің шеберлері қазылық етті.

Қазылар алқасы байқау қорытындысын жариялар сәтте бәріміз де қобалжығанымызды



жасыра алмадық. Көптен күткен нәтиже – басты сыйлық жылжымалы «Бүркіттің» иесі анықталды. Бұл жеңіс біздің сүйікті институтымыздың қанжығасына байланды. Яғни, «Агротехнологиялық» институты үздік деп танылды. Сонымен қатар «Ұлттық ән», «Үздік бейнежазба», «Үздік жайдарманшылар» аталымдары бойынша I орынды, «Заманауи ән», «Заманауи би», «Аспапта ойнау шеберлері», «Көркем сөз шеберлері» аталымдары бойынша

II орынды, «Үздік жүргізушілер» аталымы бойынша III орынды иеленді.

Біздің жеңімпаз атануымызға өз үлестерін қосқан жоғары курстың студенттерінен құралған «Алтын құрамға» және басқа да белсенді қыз-жігіттерге алғысымыз шексіз. Алда талай биіктерді бірге бағындыруға шақырамыз. Ортақ жеңісіміз құтты болсын!

Шамшырақ ЕСЕНҒАЛИЕВА,
ЗУ-11 тобының студенті

Болашақ кәсіпкерлер үшін маңызды жүздесу

22 сәуір күні «Экономика ақпараттық технологиялар және кәсіби білім беру» институтының БМУ-31, БЭК-31, БАН-31, БФЭ-31, БФЭ-32 топтарының студенттері «Uralsk Business Incubator» ұйымының қызметкерлері Абай Габделовпен және Бағдат Уәлиевпен кездесті.



Жиын барысында спикерлер «Uralsk Business Incubator» ұйымының жұмысы, мақсаты туралы ақпарат берді. Оған қоса стартап жобаларды қолдау барысында атқарылып жатқан жұмыстар мен көрсетілетін қолдауларды пысықтады.

Болашақ кәсіпкерлер көкейлерінде жүрген сұрақтарын қойып, тұшымды жауаптар алды. Студенттер арасынан өз ісін бастап, аталмыш ұйымнан көмек алғысы келетіндер де табылып, бизнес жоспар жасау үстінде екендіктерін жеткізді.

Кездесу еркін форматта өткізіліп, өзара сұрақ-жауап алмасу арқылы әдемі әңгіме өрбіді. Келген қонақтар да студенттердің алған бағыты мен идеяларына жоғары баға беріп, сәттілік тіледі.

Бұл практикаға бағытталған сабақты «Экономика және аудит» жоғары мектебінің аға оқытушылары Канбиби Нурсапина мен Назым Ахметжанова ұйымдастырды.

Мұхаммед-Әли ҚУАНЫШКЕРЕЙ,
БМУ-31 тобының студенті

Алда - жаңа маусым



Жәңгірхандық жастардың әсерлі әрі қызықты әңгімесін тыңдағыларыңыз келсе, YouTube арнамыздан еркін форматтағы «Djai otyrys» бағдарламасын көріңіздер.

Бұл жолғы кейіпкерлеріміз Бағдарлық-техникалық мамандықтарда оқып жатқандарына қарамастан, сөзге бай, тілге шешен екендіктерін дәлелдеп жүр. Университет қабырғасында болып жатқан оқиғаларды айшықтауға үлес қосып жүретін талантты жастарымыз бұл жолы қандай қызықты ақпараттармен бөлісті? Жауабын білгілеріңіз келсе, бағдарламаның

кезекті шығарылымын «ZhastarZkatu» арнасынан тамашалай аласыздар.

Ал мамыр айынан бастап бағдарламаның жаңа маусымы көрерменге жол тартпақ. Қонақ ретінде кімді көргілеріңіз келеді, ұсыныстарыңызды әлеуметтік желілеріміз арқылы білдіріңіздер!

БҚАТУ медиа орталығы



Меншік иесі:

Жәңгір хан атындағы Батыс Қазақстан аграрлық-техникалық университеті.
Газет Қазақстан Республикасының Ақпарат министрлігінде 2004 жылдың 29 қаңтарында тіркеліп, №4651 – Г куәлігі берілген.

Жәңгір хан атындағы БҚАТУ медиа орталығының директоры
Ләззат ҚАЖЫМОВА

Бас маман
Анар НҮРЛАНҚЫЗЫ
Компьютерде беттеуші және дизайнер
Қайрат ИСИМОВ

Газет Жәңгір хан атындағы БҚАТУ-дың медиа орталығында теріліп, беттеліп, Жарнама-баспа орталығында басылады.

Газет электронды түрде университеттің интернет ресурстарында таратылады. Тапсырыс: № 554
Қолжазба авторға қайтарылмайды. Мақаладағы деректердің нақтылығына автор жауапты.

Редакцияның мекенжайы:

090009, Орал қаласы,
Жәңгір хан көшесі, 51.
Бас ғимарат 206-бөлме
1-42
info_zkatu@mail.ru